

四庫全書

集部

欽定四庫全書

集部

梁谿集卷

九十八至一百

詳校官庶吉士_臣張溥

侍讀_臣孫球覆勘

總校官知縣

_臣

楊懋珩

校對官中書

_臣

潘奕雋

謄錄監生

_臣

楊汝梅

欽定四庫全書

梁谿集卷九十八

宋 李綱 撰

表劄奏議六十

條具利害奏狀

本路闕雨乞罷免奏狀

乞宮觀劄子

乞益修政事劄子

乞詳酌見糴晚米奏狀

條具利害奏狀

契勘本路盜賊久未寧息雖因民俗頑獷好復仇怨所

致要在小民迫於衣食易為凶徒之所結集若使田畝之民衣食不乏各有生理凶惡之人不得誘為徒黨安能一呼便至千百為群滋蔓猖獗臣竊見本路催起上供稅賦月椿錢及糴買數事實有未便於民間者本司已嘗具奏申陳未奉回降指揮若不別行措置小民漸至失業必致驅而為盜遣兵討捕卒無已時致赤子之流離情實可憫臣嘗叨近輔分典要藩荷恩最深欲報無所苟有所見不敢隱默今條具如左須至奏聞者

一本司近准御前金字牌降下尚書省劄子令臣催督轉運司起發上供無額斛斗尋取到轉運副使逢汝霖徐林狀節文契勘本路上供米斛係以秋苗椿辦兵火之後多有逃闕又間有災傷年分所催稅賦例皆不及舊額其上供之數逐年並蒙朝廷除豁只以實催米數起發照對上供米數舊額一百二十六萬九千石會計紹興六年一路實催秋苗止有九十萬三千三百五十九石一斗六升雖蒙減免上供

一十六萬九千石外猶有一十一萬六千石係是實催苗米外虛數無從所出又虔吉南安軍盜賊未息見蒙朝廷遣兵收捕有合豁除數目係在實催苗米之數已節次開具前項秋稅不及元豁等因依申朝廷乞以實催糴納米數起發去訖申本司照會臣勘會江西一路自兵火殘破之後又經旱灾戶口凋耗雖去年稍得豐稔人戶未盡歸業田土荒廢尚多謂如洪州分寧奉新等縣人戶所存纔有十之三四其

餘縣分號為多處不過十之六七通一路計之多寡相補纔有承平之半稅賦自然難以及額又如虔州累年為盜賊猖獗稅賦往往催科不得吉撫筠袁等州亦有盜賊殘擾去處遂致苗稅亦多拖欠若不以實入之數起發上供一切督責州縣必欲及承平額數不惟無所從出兼恐州縣不免數外科斂重困人戶非獨不足以仰副朝廷寬恤之意亦使官吏虛負罪責近已備錄轉運司具到前項因依奏聞伏望聖

慈早降睿旨令轉運司且以實催之數起發庶幾小民不至重困流為盜賊不勝幸甚

一本司去年內差幹辦公事韓岳前去諸州軍點檢奉行寬恤事件續據本官申筠袁州臨江軍係災傷最甚去處有不曾逃移人戶緣災傷草賊侵擾死失佃戶耕牛闕乏穀種無力輸納乞依湖南州縣已得聖旨指揮差官檢視民間耕種田疇只據所墾田畝多寡之數紐納稅租并臨江軍知軍趙士昂狀本軍

日逐據清江新喻三縣民戶投訴緣去歲旱歉雖不
曾逃移離業實以饑貧無牛種失於布種及雖有曾
布種去處又不能周遍逐縣不住追催枷禁鞭笞要
依遞年納戶下全稅乞從本軍施行竊詳紹興三年
正月二十七日都督府劄子節文應人戶歸業者候
催科據所墾田畝多寡之數合納租稅仍免本戶差
役一年其上件投訴民戶雖不係因逃移歸業之人
蓋是戀土不忍去父母之邦緣此饑貧失於布種原

情亦可矜憫若不隨宜措置則追納既竣無所從出
避一時刑責之患必見轉徙乞且據所墾田畝隨分
數減今歲稅租等事本司已備錄前項逐官所申事
理申奏至今未奉回降指揮訪聞筠袁州臨江軍災
傷人戶至今緣此拖欠租稅官司催督致有逃移伏望
聖慈特降睿旨下轉運司差官體究將紹興六年分
人戶布種田畝不遍拖下稅賦見掛欠者特與並行
放免庶幾小民安業不至失所

一契勘本路每月應副岳飛大軍月椿錢九萬餘貫
自來係以輕賣金銀相兼見錢起發昨緣湖北隨軍
運判劉延平移文只今起發見錢自役諸州不惟艱
於應辦其裝法縻費亦不易出自去年四月臣到任
以來催督至今共起發過一百七十餘萬貫本路錢
寶泄於他路不復可還民間闕乏號為錢荒以故穀
賤傷農民戶輸納夏稅戶帖應於名色難得見錢間
里愁歎至有委棄田產逃移者若不別行措置將來

愈見闕誤本司昨准金字牌降到御封尚書省劄子
催起月椿錢運到狀式立限取會已未起發輕賣窠
名斤兩數目以此見得諸路應副大軍皆合用金銀
相兼椿發累曾具狀奏闕伏望聖慈特降睿旨行下
轉運司許令諸州將所認月椿錢計置輕賣與見錢
相兼起發仍照應在市價例務令兩不相妨庶幾可
以椿辦不至走泄錢寶民間交易及輸納官中不至
闕乏實為便便

一契勘自來朝廷行下轉運司糴買斛斛如有糴本
則官中得米民間得錢兩為利便近年多是頒降官
告勅牒與見錢相兼已是難以行使今來朝廷降下
本路和糴專用一色關子雖有許撥經制總制錢指
揮緣應副贍軍多無見管錢物深慮糴買不行州縣
不免抑配重困民力竊緣商賈興販斛斛赴官糴納
猶可給與關子令赴所屬支請今來客旅興販稀少
唯是糴於鄉村民戶積累升斗以足額數鄉民中糴

得些小關子豈能前去數千里外官司請領必為兼并之家以賤價取之贏落官錢規圖厚利朝廷所費則一小民受害徒為富商大賈之資深屬未便伏望聖慈特降睿旨令朝廷支降見錢與關子相兼糴買糴於鄉村即給見錢糴於商賈即給關子庶幾小民獲受實惠不至重困一路不勝幸甚

右謹件如前謹錄奏聞伏候勅旨

本路闕雨乞罷免奏狀

右臣契勘本州自七月以後不雨遣官致禱管下神祠
佛宇應有仙聖靈跡去處及築壇塑龍迎請聖水躬親
齋素日事祈求雖獲感應並皆微細不得霑足見今晚
田已是亢旱此蓋守土之臣德薄人微繆當方面之寄
精神不足以感格政術不足以共理致茲旱暵覃及一
方伏望聖慈特賜罷免遴選帥守以寬憂顧臣不勝祈
天俟命激切屏營之至

乞宮觀劄子

臣契勘自今春以來實緣衰病屢上封章乞罷帥權投
置閑散未蒙矜允近為本州入秋闕雨已覺亢旱罪在
守土之臣已具奏聞乞從罷免未奉回降指揮竊念臣
憂患孤生早衰多病久苦瘡瘍復得筋攣之疾行步蹇
緩拜跪艱難加以素有疾眩醫治弗效動多遺忘常恐
顛仆一路兵民之寄事體至重儻不量力勉強負荷決
致踈虞伏望聖慈特賜哀矜許令罷免除一在外宮觀
差遣任便居住庶幾疲駑得就休息尚需廩餼以養餘

齡感戴天地之恩何以圖報干冒宸嚴臣無任

乞益修政事劄子

臣聞和氣致祥乖氣致沴天人之際應若影響不可誣也政令和平合於民心天應以福雨暘時若而為豐歲此和氣致祥之符也政令乖戾拂於民心天應以災水旱極備而為凶年此乖氣致沴之符也豐凶之本乃在人主心術朝廷注措之間宗社之安危生靈之休戚繫焉可不懼乎前年江湖閩浙嘗苦大旱流移失業殍踣

相望陛下軫慮之深不遑暇食親灑宸翰勸誘賑濟其所全活不知其幾千萬人至誠動天報以休應曰雨而雨曰暘而暘歲大豐穰民以安樂自經一稔之後上下恬嬉不復勤恤民隱朝廷意民間之有蓄積百色誅求上供不以實數而以虛額和糴不以本錢而以關子絲蠶未生已督供輸禾穀未秀已催裝發州縣困於轉輸文移急於星火官吏愁歎閭里怨咨感動天心旱災復作江湖淮浙所被甚廣歲且歉食人情驚疑如居風濤

淘淘靡定然則陛下欲消弭災異導迎吉祥不必他求
但如前日之用心自然感召和氣休應立臻則旱暵必
復為豐年矣昔周宣遇災而懼側身修行欲銷去之而
王化復行雲漢之詩是也安知旱暵之災行為中興之
資乎願詔朝廷益修政事凡所以賑救民災給足軍食
者早正素備無待倉猝取具於臨時也方今強敵憑陵
僭竊窺伺屯兵淮許以為控扼欲進則未能欲退則不
可開口待哺於縣官者數十萬人平時運餉已極勞費

歲一不稔將何以給之夫今日之患欲民力寬則軍食
闕矣欲軍儲裕則民財匱矣二者如鐵炭之低昂此首
重則彼尾輕非有術以權之使斂不及民而軍食足不
可得而均也孟子曰無政事則財用不足今屯兵之數
不多於前時而養兵之費十倍於往日死生去來無籍
可稽上功行賞無實可考轉資遷秩者動以萬計廩祿
之費又不知其幾何也開端者不可復斂放行者不可
復收日益月加無時而已天地之生財有時人力之理

財有限而度量不立於其間養兵之費有增無減坐致
耗屈竭出於民謂之有政事可乎此臣之所以日夜為
陛下寒心者也夫政事立然後財用足財用足然後軍
食給軍食給然後民力寬民力寬然後天心格天心格
然後和氣可召而為豐年此臣所以願陛下救今日之
弊以修政事為先也臣仰察天時俯揆人事今日誠為
危急存亡之秋惟陛下念宗社生靈之重圖為善後長久
之策留神邦本天下幸甚臣以衰病屢乞閑散將歸山

林不勝憂國之情輒復自竭陳其大畧以瀆天聽如聖
心尚有所疑願賜清問得以展盡底蘊為陛下詳言之
誓罄狂瞽仰酬大恩臣無任

乞詳酌見糴晚米奏狀

右臣契勘本路春夏之間雨暘調適早禾已是成熟收
割了當自入秋以來闕少雨澤已覺亢旱又生青蟲食
害苗稼見今祈禱未獲感應若更旬日內無雨晚田決
致旱傷竊見朝廷近降指揮受納秋苗及和糴米斛並

要一色晚米竊慮既不糴納早米晚稻又失指準有誤
大計伏望聖慈特降睿旨令朝廷更賜詳酌施行

梁谿集卷九十八

欽定四庫全書

梁谿集卷九十九

宋 李綱 撰

表劄奏議六十一

論淮西軍變劄子

乞黜責或宮祠奏狀

繳奏修舉過職事乞宮祠狀

奏陳淮西事宜獎諭詔書

謝獎諭表

論淮西軍變劄子

臣據舒蘄江黃州探報鄜瓊叛逆擁淮西全軍並都督

行府廬州官吏兵民等盡歸偽齊松江州郡人情惶駭
此誠不測之變朝廷措置失當深可痛惜者也臣請為
陛下條陳之劉光世治軍素無紀律遇敵輒避衆所共
知不為無罪然其所部軍馬皆陝西西蕃部落招降巨
盜及簽軍漢兒勅海之流最為厖雜烏合光世御之以
寬頗得其心平時不至散叛已為不易去冬賊騎侵犯
淮西光世初雖左次以避敵終能返旆而成功朝廷因
而撫之激厲士氣亦足控制一面乃輕從其請罷兵柄

而投閑散將士缺望遂生攜貳之志此措置失當者一也既罷光世帥權即當豫選武臣之有威望知略者以為之代使將士悅服人無間言則一軍安矣乃遣呂祉以參謀總師分守不正不足以蒞軍事名望素輕不足以厭衆心號令賞罰亦必有不合其宜者馴致變亂豈無自而然哉昔人有云每一發兵頭鬚為白此言用兵之難也社以書生驟得官職意謂功名可以唾手而取輕當委寄智小而謀大力小而任重坐使叛將得成其

姦此措置失當者二也王德鄺瓊在光世軍中皆號梟將德以嚴猛失士心瓊以姑息得衆情平時已不相能易帥之後自當分置他軍以絕間隙乃使共事以成忿爭呂祉又不能駕御而調和之宜其生變此措置失當者三也初光世一軍老小盡寓太平宣城將士進屯廬壽限以大江足以繫累其心非小補也自今夏經火災之後乃悉徙居江北以此悅衆而不知有攜手同歸之虞術亦踈矣此措置失當者四也王德擅離職奔歸行

朝正當權時之宜歸罪于德械繫有司遣使撫存軍中
喻以禍福必有忠義奮發安衆而解紛者衆情既安瓊
必遁逃借有從者不過部曲耳密諭鄰境諸帥出兵遮
截邀擊於要害之地瓊必成擒不務出此而亟置宣撫
制置使副臨以重兵是趣之使去也生靈遭屠戮官吏
被驅虜數萬之衆一朝失之誰任其咎此措置失當者五
也軍旅之事機會之來間不容髮措置一失禍患隨之
而況五乎深可痛惜試畢其說自艱難以來所乏者兵

西北將士尤為難得以百金募一卒以萬金養一士未足為多十年之間疾病損死所餘幾何今一旦而亡數萬之衆棄撫育之恩歸仇讎之境此深可痛惜者一也捨我歸彼賊勢益張朝為君臣暮為仇敵如李成孔彥舟闕師古輩我不能有反為賊用致死於我可不悲乎鄜瓊將士備知東南曲折秋高馬肥為之鄉道以擾江淮寧不可慮此深可痛惜者二也朝廷屯重兵於淮南以為藩籬仰此一軍控制廬壽盡卷而去藩籬缺矣何以

補之拆東補西愈見踈闊姦逆窺伺強暴憑陵喪威辱
國自取予侮此深可痛惜者三也近年議戰士氣稍振
去冬累捷國勢浸強將定恢復之謀漸成中興之業而
以措置失當之故亡此全軍使忠臣義士扼腕憤歎此
深可痛惜者四也此端一啓人各有心後來將帥何以
號令此深可痛惜者五也書曰雖悔可追語曰既往勿
咎此雖措置失當深可痛惜然既往之事不可復追臣
願陛下鑒前失以圖將來而已所謂鑒前失以圖將來

者降罪已之詔痛自追咎以收人心一也謀善後之策益務持重以固國勢二也增宿衛之兵以備不虞三也採者哲之言而勿偏聽四也堅聖心之守而勿輕變五也遇變而懼修省以應之其說固多然在今日莫先於此五者昔明皇幸蜀中道將士有散叛之心明皇下哀痛之詔諭以誠意衆志乃定德宗遭奉天之變所降詔令武夫悍卒聞皆感泣卒復京師陸贄有言曰動人以言所感已淺言又不切人誰肯懷所謂降罪已之詔痛

自追咎以收人心在今日為不可後也天方艱難深閔成功之所正如逆風行舟用盡氣力不離本處兩年以來經營恢復蓋亦勤矣然卒未能收尺寸之功令一朝以措置失當之故人心攜離士氣凋喪豈可不相時之宜暫輟攻取之謀且為固守之計靜以待之俟人心之既寧士氣之復振然後可以行師順時而動以訖天誅所謂謀善後之策益務持重以固國勢在今日為不可後也天子所居上憲乾象紫微之宮三光之廷皆有藩

垣以拱衛宸極行幸之所尤宜嚴備以待非常今陛下
巡幸省方駐蹕建康而禁衛單弱朝廷初不留意近聞
楊沂中劉錡皆以殿前中軍及侍衛馬軍司兵出成淮
甸外重內輕誠可寒心肘腋倉卒何以待之明受之變
商鑒不遠所謂增宿衛之兵以備不虞在今日為不可
後也昔秦穆公歸自崤作書以自誓其言曰尚猶詢茲
黃髮則罔所愆又曰如有一介臣斷斷猗無他技其心
休休焉其如有容人之彥聖其心好之不啻如自其口

出是能容之以保我子孫黎民亦職有利哉夫黃髮之臣其經歷久詢之則利害必審好善之臣其忌嫉少容之則薦進必多方召以元老壯猶而興周房杜以持衆美效之君而興唐職此之由也夫專任乃能成功而偏聽亦能致亂顧所以聽任者何如耳漢唐之初以專任興秦隋之季以偏聽亡是以堯舜之世任賢勿貳任欲專也明目達聰聽欲廣也方今寇偽鳩張將士離散天下危於累卵陛下得不廣聰明為扶顛持危長久之計乎

所謂採耆哲之言而勿偏聽在今日為不可後也自古
創業中興艱難之際叛將不能無也在高祖時有若盧
綰陳豨在光武時有若彭寵盧芳在太宗時有若輔
公祐王君廓德宗奉天李懷光叛之肅宗靈武康楚元
張嘉延叛之晉遷江左蘇峻祖約叛之惟能因時制變
旋即討定故不足為患今淮西一軍數萬之衆一旦叛
去固不為小變若能應之於後亦未足為吾害也或謂
敵人得吾叛將因而用之決須深入建康去淮南不遠

勢恐難安是不然韓世忠兵屯淮東張俊楊沂中兵屯淮西岳飛兵屯上流不下數十萬人又有長江天塹之際若能撫綏將士措置合宜號令得所賊馬豈敢深入儻以一時之變而議退避則車駕一動大事去矣所謂堅聖心之守而勿輕動在今日為不可後也帷幄之謀必有勝算愚臣私憂過計不識忌諱激於忠憤忘生觸死冒進狂瞽然臣聞天地之變不足為災人不盡言國之大患侍從者獻納論思之官也臺諫者耳目腹心之

寄也今侍從臺諫以言為職類皆毛舉細故以塞責所
論不過簿書資格守倅令丞除授之失當至於國家大
計係社稷之安危生靈之休戚者初未聞有一言及之
陛下試察如淮西之變侍從臺諫之臣亦有見危納忠
為陛下言之者乎大臣懷祿而不敢諫小臣畏罪而不
敢言此最今日之可憂者臣以蠢愚夙荷睿獎每思竭
盡以報大恩第以人微跡踈無階自致遇事輒發罪當
萬死伏望聖慈哀憐孤忠留神聽覽僅有補於萬分之

一雖死之日猶生之年也塵瀆天聰臣無任惶懼待罪之至

小貼子

臣續據探報鄺瓊驅虜官吏兵民老小凡二十餘萬人北去兵部尚書都督府參謀軍事呂祉並帥臣等並為所執統制官喬仲福張景劉光時等死之此豈小變未聞朝廷別有處畫臣以踈遠初不敢論列再三思之當艱危之際仰荷重恩嘗蒙詔許令入告若

不盡言實負陛下然臣前件劄子指陳朝廷措置失當憂憤所激情迫言切難以復處藩方已別具奏聞乞賜黜責或檢會累奏除一在外宮觀差遣以安愚分伏望睿察臣近准都督府劄子招收淮西回易官兵已差都承旨張宗元前去措置臣竊以宗元之行何異於呂社更望聖慈詳酌淮西軍事只委制置使楊沂中為使伏乞睿察

乞黜責或宮祠奏狀

右臣已具劄子論列淮西叛將酈瓊事宜奏聞其言指陳朝廷措置失當但欲納忠於國情迫言切必有抵忤難以復當帥守之寄伏望聖慈特降睿旨黜責施行兼臣久患足弱拜履有妨疾眩為梗動虞顛僕累奏乞宮觀差遣未奉俞允今來感時憂憤疾勢益深如蒙矜憐察其用心未忍竄殛只乞除一外任宮觀任便居住曲賜保全以安愚分干冒天威臣無任

繳奏修舉過職事乞宮祠狀

右臣伏以衰病累具奏陳乞罷帥守除一外任宮觀未奉回降指揮竊念臣憂患之餘誤蒙聖恩付以江西一路重寄夙夜黽勉未敢自暇以圖報知遇之萬一自去年四月初到任至今年八月終已及一年五箇月適值旱歲遵奉聖旨賑濟勸糶以活饑民又依稟朝廷指揮招填軍額建置營房修築城池繕治器甲增修官府廩蓋倉庫催發錢糧招捕盜賊皆係臣躬親逐一措置處畫心力殫耗幸已就緒今者以病乞身即非別有規避

兼臣近以淮西叛將事宜指陳朝廷措置失當實緣憂憤成疾心氣不寧思慮顛錯難以安職伏望聖慈哀矜特降睿旨檢會臣累奏罷臣江西安撫制置大使兼知洪州除授宮觀差遣以養病軀以安愚分所有臣在任修舉到前件職事釐為六狀仰瀆睿覽無任惶懼戰越之至

奏陳淮西事宜獎諭詔書

勅李某省所奏陳淮西事宜切中事機事具悉昔留侯

以八難止食其之說買臣以十策屈公孫之謀蓋人主有廣覽兼聽之明則臣下有竭智盡忠之益卿位隆將相計安國家身雖任於藩方心實存於王室比閱淮堧之議蔚有漢臣之風去兩短集兩長所願聞於藥石畫一奇出一策尚不廢於芻蕘矧乃嘉猷毋忘入告故茲獎諭想宜知悉秋冷卿比平安好遣書指不多及

謝獎諭表

臣某言伏蒙聖恩以臣奏陳淮西事宜切中事機特降

詔書獎諭者事君無隱敢輸憂國之謀陳力不能輒布
乞身之懇恩頒溫詔感集愚衷中謝伏念臣猥以諸生
偶陪興運三朝被遇誓殫夙夜之勤一紀孤危備歷風
波之險曲荷聖神之眷濫當帥守之權識昧知幾豈能
料敵而制勝才非任重惟其置散以投閑蓋常出位而
多言祇欲辭榮而養疾囊封屢貢上千鈇鉞之威綈檢
誕敷遽冒絲綸之寵茲蓋伏遇皇帝陛下道隆覆載明
極照臨察其犬馬之誠每加聽納憫其簪履之舊未忍

棄捐特軫皇慈荐垂睿訓榮既踰於華袞懼若殞於深淵臣敢不仰體至仁俯全晚節危言入告益思藥石之忠衰疾丐歸願遂山林之志

梁谿集卷九十九

欽定四庫全書

梁谿集卷一百

宋 李綱 撰

表劄奏議六十二

奏陳利害劄子

乞宮觀奏狀

奏陳車駕不宜輕動劄子

乞令湖北京西宣撫司差兵控扼江表奏狀

進御書草聖千文贊劄子

奏陳利害劄子

臣近者不量淺短輒冒萬死條陳淮西叛將利害仰瀆
天聰夙夜靡寧以俟嚴譴伏蒙聖慈既赦狂瞽又降璽
書特有褒諭感戴大恩非臣糜捐所能報稱然臣竊見
都進奏院報張浚罷相以言章落職宮觀淮西之變浚
實有罪責罰之加其誰曰不宜但言者引漢武誅王恢
事以為比臣愚竊以為不然試為陛下陳之昔王恢設
馬邑之謀欲誘匈奴擊之事既不諧武帝以造兵謀本
出恢動大衆而無成功不誅無以謝天下遂下恢廷尉

此武帝之過舉非盛德事也何則勝負兵家常勢顧規
畧何如耳易象有左次無咎之言兵法有善敗不亡之
戒渠以一失遂害大計哉觀秦穆之用孟明拜賜於三
北之餘光武之用馮異收功於桑榆之際則知武帝之
誅恢未為無失也今浚之罪乃在於志廣才踈力小任
重不能諮諏良策而專於自用不能輯睦將帥而輕務
改移遂致士卒攜離捨我就敵以此罪浚夫復何辭若
以王恢為比咎其始造兵謀則是因咽廢食懲羹吹壺

以細故而搖大計恐非策之得也今方強寇憑陵僭逆
窺伺國勢未定人心驚疑若不注意治兵以為自強之
計則何以安宗社保生靈固邊疆禦外侮徒以措置一
失之故遂欲盡棄前日之所為歸罪始造兵謀者臣恐
智謀之士卷舌而不敢談兵忠義之臣扼腕而無所發
憤將士解體而不用命州郡望風而無堅城陛下將誰
與立國哉且今日朝廷之勢固自若也襟帶江淮保據
荆襄連接川峽韓世忠張俊岳飛吳玠之軍分屯要害

不下數十萬人兵未為弱去冬敗劉麟劉猷之徒甚衆
用兵未為不利倘因淮西之變益自懲創審號令明紀
律徙諸軍家屬於江南以便糧餉教戰艦水軍於汳江
以備不虞姑輟進取之謀且為固守之計和協輯睦靜
以待之使國勢漸定人心漸安士氣漸振乃可徐議恢
復譬猶病人調治向安又為藥餌所誤傷其正氣豈可
遽欲康強哉不察此理經變故而亟動搖使外寇得以
乘其間隙譬猶弈碁前著既差後著復錯是謂自敗欲

求勝敵不可得也臣頃年嘗因賊馬入寇淮甸獻陳愚計以謂退避之說不可行於今何哉前之為寇者金人也利於虜掠得所欲則還師今之為寇者偽齊也利於土地得一郡則守一郡得一邑則守一邑翠華退避之後將士奔潰賊勢鸛張將安所定止哉誤蒙採擇特降褒詔今日之說亦猶是也伏望陛下堅聖心而勿動修軍政以自強無為趣時獻言者之所搖古語曰臨大難而不懼聖人之勇也惟陛下留神幸察夫張浚措置失當

誠有罪矣然其區區徇國之心有可矜者願少寬假以責來效昔漢高祖用兵喪師跳身者屢矣然卒與成功者皆舊臣也借使每敗必逐則張良陳平之流不勝其誅矣臣前所論淮西事宜指陳浚措置失當非黨浚者今此論奏亦非為浚游說也因言者引王恢造兵謀之喻深恐退避講和之議復出以眩惑聖聽則大事去矣宗社安危自此而分故敢披露肝膽冒昧有言死有餘罪臣以衰病累請宮祠未奉俞允邇來犬馬之疾益深

將填溝壑已別具奏乞骸骨以歸山林貪戀明時何可言喻愛君憂國之志雖在畎畝豈敢弭忘伏望陛下哀而憐之干冒天威無任惶懼戰越之至

小貼子

臣契勘朝廷所恃以禦敵者將士也新失淮西之軍將士之心未定正當靜以養之頻降詔旨慰勞撫諭使明知陛下德意所在庶幾士心復安若先為退保之計以示怯敵臣恐諸軍將士解體人人無固守之

志為盜之招昔真宗皇帝澶淵之行未定又欲南幸
召高瓊謀之瓊對曰南幸無不可者但慮將士離散
不復可收遂定親征之謀臣以謂正與今日之事相
類竊見近降指揮應副廬壽盱眙等處米斛並改撥
赴建康府下卸又差梁汝嘉知平江府外議皆謂車
駕將幸平江平江與建康相去不遠徒有退避怯敵
之名臣私憂過計冒昧上聞不勝皇懼伏乞聖察

臣近據岳飛公文今月十九日部率軍馬前去襄漢

臣契勘淮西兵將新叛之後藩籬踈缺並無控扼朝廷近降指揮令飛分兵屯駐江池等州事理正宜如此今乃前去襄漢上流空虛緩急何以應援伏望聖慈詳酌特降睿旨令飛屯兵照應江池及淮西一帶候過防冬措置襄漢未晚伏乞睿察

乞宮觀奏狀

右臣近以衰病累具奏聞乞罷帥權除一宮觀差遣伏蒙聖慈降詔不允仰荷大恩第深感涕竊念臣孤陋無

取誤被眷知起於閑廢之中付以方面之寄竭來江右
物華再秋雖殫夙夜之勤曾蔑涓埃之補而臣年衰景
暮福過災生百病之所交攻萬慮之所纏集將遂填於
溝壑願休息於山林方本路盜賊稍衰之時兼汧江邊
報未急之際不乞身而閑退必誤國以顛隳伏望聖慈
特降睿旨檢會臣累奏除一外任宮觀從便居住或許
守本官致仕庶幾專近醫藥尚保餘齡干冒天威無任
惶懼戰越之至

小貼子

契勘臣自春夏以來久患瘡瘍纔稍痊安又得足弱筋攣之疾拜跪艱難步履蹇緩至今未愈近來復苦心氣煩憤健忘漸成淋疾醫者謂憂慮傷損所致若不控告君父罷免帥權少就閑散決難自全伏望聖慈哀憐特從所請使得歸休保養衰疾異時蒙被驅策不敢辭難伏乞睿察

奏陳車駕不宜輕動劄子

臣近因上疏論淮西事宜嘗獻狂瞽竊謂車駕不宜輕動正當靜以鎮之諸將重兵不宜抽回正當分屯要害益為自固之計妄意及此其說畧而未詳今聞朝廷以梁汝嘉知平江勑蓋營屋萬餘間及召張俊楊沂中全軍還駐建康如此則是移蹕之謀抽回軍馬之計皆審如所聞宗社安危生靈休戚繫此一舉敢冒萬死為陛下詳陳之臣聞自昔用兵以成大業者必先固人心作士氣據地利而不肯先退盡人事而不肯先屈是以楚

漢相距於滎陽成臯間高項雖屢敗不退尺寸之地既割鴻溝羽引而東遂有垓下之亡曹操索紹戰於官渡操雖兵弱糧乏荀彧止其退師既焚紹輜重紹引而歸遂喪河北由是觀之今日之事豈可因一叛將之故望風怯敵遽自退屈果出此謀六飛回馭之後人情動搖莫有固志士氣銷縮莫有鬪心寇僞乘之誰為陛下堅守苦戰以禦大敵者且建康去平江無數百里之遠非有高山大川以為限隔健馬疾馳數日可至徒有怯敵

之名無益退避之實建康有長江天塹之險不能固守
何有於吳會哉聲勢所逼退而之臨安又退而之會稽
又退而之閩粵極矣我退彼進使賊馬南渡得一邑則
守一邑得一州則守一州得一路則守一路亂臣賊子
黠吏奸氓從而附之虎踞鸛張雖欲如前日返駕還轅
復立朝廷於荆榛瓦礫之中不可得也偷取目前之安
不顧異時噬臍之悔非策之得者借使寇騎衝突不得
已而權宜避之猶為有說今幸疆場未有警急之報兵

將初無不利之失朝廷正可懲往事修軍政審號令明賞刑益務固守而遽為此擾擾棄前功蹈後害以自趣於禍敗豈不重可惜哉臣故曰車駕不宜輕動正當靜以鎮之者此也臣又聞自昔有江表者必以淮南為藩籬屯重兵於江北然後江南可安六朝相繼數百年雖將堅石勒宇文拓跋之盛不能陵踐凡以強藩巨鎮盡列淮上也故後唐李氏有淮南則足以保國既失江北國勢遂卑由是觀之今日之事豈可因一叛將之故悉

罷屯戍遂欲棄置於度外張俊既去盱眙楊沂中又去廬壽李宏獨以千兵守之使賊挾叛將以來則廬壽必不能守前日酈瓊之叛屋宇倉廩置而不焚豈無深慮使賊得據合肥則舒蘄光黃一帶無兵可禦決須退保是賊無亡矢遺鏃之費以談笑而下淮西也一失淮西與之共長江之利江南可得無患乎州縣無備人情震駭一患也鹽貨不通糧餉皆阻二患也濟渡多端難於控扼三患也時出兵以擾我疲於奔命四患也得吾州

縣蝟結蟻聚水草有依遂為吾之痼疾五患也昔人有
言長江千里當備者不過數處如人一身腠理為急淮
西者今之腠理也賊馬入寇必趣廬壽前日以劉光世
全軍數萬人守之猶懼不濟今乃無兵是委重地與敵
以為背脇疽根豈不重可惜哉臣故曰諸將重兵不宜
抽回正當分屯要害益務自固者此也前日劉光世一
軍以措置失當之故將士攜離捨我歸敵非細故矣萬
一因此翠華移蹕將士呂還以致不可勝言之患是措

置之失又非前日之比也昔人有言動不詳思輒喜言
誤誤不可數也臣觀朝廷自建炎以來每失機會其誤
多矣譬猶奕者前著雖差後著猶可救也若著著皆誤
何以取勝傍觀者得不為之寒心臣愚竊思所以為今
日計願陛下深體漢祖之用心堅忍而勿輕變非有大
警急姑少安之丁寧訓戒三四大臣益圖所以自固之
策遣張俊全軍進屯廬壽而存其家屬於建康以便糧
餉命韓世忠兼保盱眙而留楊沂中以衛行在詔岳

飛分兵江池以保上流汾江有備則國勢亦粗定矣前
日初造車船戰艦所費不貲初不聞置軍教閱將安用
之謂宜收拾於建康上流州縣如太平江池等州蕪湖
繁昌湖口等縣擺泊仍於江湖間募習水善游者萬餘
人刺手背為水軍差官統領分隸教習使金鼓旌旗上
連下接以備緩急之用則賊騎雖熾亦豈敢遽窺江右
哉使今冬防守無虞則人心自安國勢亦固可以徐圖
善後之策捨此不為而但務退保臣未見其可也抑臣

聞之書曰民非后罔戴后非衆罔與守邦又聞之孟子
曰保民而王莫之能禦天子作民父母必有保民之心
然後衆心欣戴如子之保父母此上下之所以能相固
也蜀先主去荊州從之者數萬人曹操逐之或勸捨衆
而速行先主曰衆人從我豈忍棄之說者謂其有帝王
之度區區偏霸之主猶如此而況於天下之君乎臣願
陛下以保民之憂為先則雖弱必強中興之業不難致
矣臣以愚拙每進狂直之言必蒙褒納有君如此其忍

負之故敢於艱虞之時復進苦口逆耳之說言或可採
願陛下與三四大臣熟議利害斷而行之庶幾有補萬
一徒能容納而不用無益也昔漢高祖開濟大業非無
張良陳平之臣出奇畫策動必有功然勸為義帝伐項
羽者三老董公也勸出武關置軍宛葉者轅生也勸都
關中者婁敬也勸以親子弟王齊者田肯也必有衆謀
乃能有濟今臣以孤陋遠在千里之外每有所聞輒獻
臆說仰裨廟謀尚庶幾於數子伏望聖慈赦其罪而取

其忠天下不勝幸甚

乞令湖北京西宣撫司差兵控扼江州奏狀

九月二十四日准樞密院九月十四日劄子節文本司
申契勘鄺瓊靳賽等率淮西兵將全軍反叛驅擁官吏
軍民歸附偽齊竊慮不測前來汭江諸處作過其江州
委是要害去處並無兵馬控扼欲望朝廷檢會本司近
奏事理速降指揮行下湖北京西宣撫使司差撥軍馬
前來興國軍江州駐劄以備不虞右檢會八月二十一

日奉聖旨令岳飛差撥水軍三千人乘駕戰艦委近
上統制官統率順流於蘄陽鎮擺泊仍令差先鋒人船
前往江州屯駐照應控扼近據岳飛奏緣淮甸即日別
無探報如稍警急自當量其賊勢輕重即時調發軍馬
前往蘄陽或江州照應劄本司照會契勘本路係抵接
淮西界分去偽境不遠近廬州鄆瓊等反叛之後日有
探報以北事宜緣今歲防秋事體即與以前年分不同
其本路沿江一帶及蘄黃等州緊要控扼去處並未有

軍馬防捍兼本司見管官兵人數不多又緣諸州縣管下有未獲盜賊殘黨各已分差前去捉殺所有江州等處合屯軍馬若候有警方遣前來竊恐後時却致遲悞欲望朝廷特賜詳酌行下湖北京西宣撫使司先次遣發軍馬前來江州一帶屯駐預行措置控扼防拓免致臨時誤事

進御書草聖千文贊劄子

臣伏覩皇帝陛下以御書草聖千文贊寵賜寶文閣直

學士右太中大夫江南西路都轉運使臣子洎宸章奎
畫璨然如繁星之麗天臣輒摹勒置於豫章州學宣聖
殿陰使諸生得以瞻仰且拜手稽首作贊系於刻石之
末詞旨淺陋不足以揄揚盛美臣則有罪謹繕寫在前
并以石本裝治進呈干冒天威臣不任惶懼

欽定四庫全書

集部

梁谿集卷一百一
三至

詳校官庶吉士臣張溥

侍讀臣孫球覆勘

總校官知縣臣

楊懋珩

校對官待詔臣

胡士震

謄錄監生臣

俞昌言

欽定四庫全書

梁谿集卷一百一

宋 李綱 撰

表劄奏議六十三

條具防冬利害事件奏狀

乞施行余應求張翬捕盜功效奏狀

乞施行修城官吏奏狀

謝提舉臨安府洞霄宮表

條具防冬利害事件奏狀

契勘臣近累具奏聞以衰老疾病難當方面委寄乞罷
帥權除一宮觀差遣或許守本官致仕伏蒙聖慈降詔
不允仍令依累降指揮不得再有陳請感戴天恩涕泗
橫集臣雖衰病敢不黽勉自力用忘疾憊以圖報萬一
然臣所管江西一路實為上流輔翼建康駐蹕之所蔽
障閩廣接連荆湖自江以北控引淮西去偽境不遠豫
章九江興國三郡縣地千餘里皆係要害去處虔吉筠
袁等州素產盜賊蜂屯蟻聚千百為群不可勝計而自

近年以來帥司所統軍馬盡為諸將之所兼并器甲錢糧席卷一空臣到任之初蒙朝廷差到申世景一軍纔千餘人比因盜賊猖獗又蒙指揮添差李貴步諒軍馬人亦是不多仰賴朝廷威靈兩年之間招捕群寇凡數十火幾數萬人逆者誅鋤順者惠來幸悉寧謐惟是防冬以捍大敵之具闕然未備誠可寒心近日探報敵人增兵駐陳蔡潁昌臨汝諸郡與舒蘄光黃對境相望間遣步騎渡淮作過未有重兵可以捍禦九江興國汾江

一帶又無精卒為之控扼新經鄺瓊之變藩籬踈缺人心動搖萬有一穴騎奔衝有南牧之意何以待之今年防冬非去年比而本路空虛軍馬單弱與去年無異如臣一介書生蹤跡孤遠豈敢虛任重責積憂成疾恐誤國事屢此乞身非得已也今者既蒙聖恩未忍棄捐尚使待罪藩方以備驅策自非投誠控告君父洞照幾微審量事勢摘那兵將假以權宜使得竭犬馬之力圖尺寸之報則何以仰副使令庶無罪悔敢陳愚懇冒瀆天

聰伏望聖慈曲賜矜察特從所請所有防冬合行事件
謹畫一條具下項

一本路或為賊馬侵犯理當隨宜措置倉卒緩急之
際有難待奏報者欲乞應防冬事件特許臣以便宜
施行訖奏聞

一本路元置安撫制置大使司差兵二萬人近年撥
付都督府及分隸諸將湍奔矢往并無留者雖蒙差
到中世景李貴步諒軍馬人數不多又以虔吉筠袁

等州盜賊殘黨之故分屯彈壓不可輟那目今防冬之際勾集使喚全然缺乏夫以一路十餘州數千里之地與敵相隣日夜窺伺防守之職責在帥司而不畀以重兵徒有其名而無其實雖使廉頗李牧為帥亦不能有所施設而欲付一衰病書生使之談笑却敵安能有濟倘或兵將足用使令不乏臣雖不才殫竭駑鈍臨機制變庶幾尚可為朝廷獨當一面以保上流不能則繼之以死所甘心焉無兵將虛受重責

一死雖小臣實惜之至於敵至而避懷邱遠遜但為
身謀不為國計則非臣之素志也伏望聖慈特降睿
旨差撥可用軍馬五七千人與見管之兵相兼使喚
庶幾不致誤國方朝廷新失淮西之兵非不知缺乏
兵將然摘那應副於當用之處有不可已者伏望留
神幸察

一本路江州最為重地自昔六朝皆屯大兵擇名臣
以居之吳則陸遜東晉則溫嶠陶侃誠以控扼上流

不可與他郡比也方今車駕駐驛建康九江尤為要害雖嘗降旨令岳飛分兵屯泊至今未聞有至者夫兵貴合不貴分此特兵家常勢至於要害之地當分兵控扼使敵人不敢窺伺所謂先人有奪人之心豈可執哉近年九江為馬進所據朝廷遣大兵攻討幾半年僅能克之今舒蘄光黃並無捍蔽使敵騎奔突占據九江則江東西必大震擾其為患非淺淺也伏望聖慈特降親筆趣飛分兵疾速依近降指揮屯駐

江池以固上流之勢事不可緩

一東北流移之人布滿江西其間多少壯可用者無業可歸迫於饑寒類多失所朝廷近降指揮令招充闕額禁軍誠為得策然必令刺填洪州軍額一隸軍籍卒無脫期非人情所樂遂致無願就者深慮轉徙溝壑或流為盜賊誠可矜憫伏望聖慈特降睿旨許令招民充義兵只刺手背日加訓練聽本司使喚所有錢糧本司自行應副支給候過防冬具人數申取

朝廷指揮實為利便

一田邦直一軍五百餘人元係本司軍馬昨緣本司兼蘄黃等州宣撫使差往蘄州駐劄錢糧之類並依本司應副近來差屯光黃州又得探報就移廬州屯駐淮西既屯重兵邦直之兵人數不多必不藉此本司得之可以增重兵勢分布使喚伏望聖慈特降睿旨將田邦直一軍撥還本司實為利便

一本司昨得朝廷指揮許置都統制一員遇有賊盜

會合廣東福建軍馬並聽節制近據廣東統制官韓
京申見令將官曹紹統所部兵七百人在循州興寧
縣駐劄聽候使喚又據福建統制官王進申見統所
部軍馬在汀州駐劄兩界首見無盜賊皆去本路不
遠伏望聖慈特降睿旨許臣勾抽使喚候過防冬發
回逐路

一本司年例蒙朝廷支降錢十萬貫應副防冬支用
去年防冬不敢紊煩朝廷今年防冬非去年比竊慮

緩急缺乏無以支梧緣本司見有朝廷出賣茶引錢
伏望聖慈特降睿旨許依年例於茶引錢內應副庶
幾不致悞事

一洪州月支官兵糧米七千餘石歲支八萬五千餘
石除正苗米盡數起發上供外本州所得耗米等支
用僅及其半去年蒙朝廷支撥二萬石尚猶侵用過
上供米一萬二千餘石已具奏聞乞行銷破今年秋
早差官檢踏放數不少又有閏月支費益多已具奏

聞乞依去年例於上供米內支撥應副外更乞添支
二萬石伏望聖慈特降睿旨支撥施行

一防冬之際全藉有以激勸將士使之用命伏望聖
慈特降睿旨給降從義郎至承信郎告各五道進武
校尉至進勇副尉綾紙各十道付本司收管遇有實
立功效之人畫時書填給付候過防冬具用過數目
繳申朝廷具立功官高之人別具功狀保明供申聽
候朝廷指揮

一江州舊屬江東朝廷以與洪州相為表裏割隸江西誠為利便惟南康軍建昌縣間於江州洪州之間犬牙相錯不屬本路每遇防冬之際措置斥堠濟渡軍馬難於號令深屬不便伏望聖慈特降睿旨許令南康軍及建昌縣兼聽本司節制庶幾不致缺誤右謹件如前謹錄奏聞伏候勅旨

貼黃

臣契勘建炎三年突騎自武昌渡江侵犯江西當時

但為退避之計宮省既行帥臣亦遯兵民莫有統率
之者遂致洪州殘破最為慘酷撫吉筠素皆被其害
紹興元年李成馬進占據九江自筠及洪賊勢猖獗
朝廷命將帥統重兵以破之賊馬遠遯保全一路以
至今日由是觀之退避之與進討其效可見今本路
自兵火之後六七年間涵養休息漸復承平舊觀萬
一寇偽乘間南牧欲退避則不可欲進討則無兵不
知朝廷使臣何以處之委一路生靈及財賦根本之

地置而不恤使寇偽得以占據未見其可也若謂賊未必來及淮上有兵如去冬之捷雖來未必能南渡皆出僥倖僥倖豈可數哉如臣畫一所陳皆防冬所不可闕及審度朝廷可以應副者方敢冒昧以聞伏望聖慈與三四大臣熟議早降指揮如朝廷以為不必遣兵實難虛受重責乞檢會臣累奏所乞或先次黜責施行伏望睿察

臣契勘近據探報壽春府光州皆有賊馬渡淮前來

作過稱係孔彥舟王孤角等軍馬委是警急所乞兵
將伏望速降睿旨差撥或旋次起發前來應副分擘
使喚伏乞聖察

乞施行余應求張翬捕盜功效奏狀

勘會本路虔吉等州管下昨來不住有亮徒結集羣衆
肆行警劫鄉村殘破縣道逼近州城潰散巡尉官兵殺
死知縣及捕盜官猖獗作過臣節次遣發兵將及關牒
提刑司官同共督責諸州措置招捕過大小頭項賊火

六十餘件已行開具申奏朝廷訖契勘本路提點刑獄公事余應求虔州張翬自到任以來夙夜究心同共協力措置施設方畧遣兵殺獲兇賊劉宣溫鐵彈羅十二劉四花魏照等賊徒及生擒賊首劉宣劉洪并招安到久不獲敗賊首周十隆謝小鬼賴十九丁二十一劉動天謝先謝聰羅動天尹寶張大閑方叔公等頭項火數不少目即本路惟吉袁州抵接湖南界及虔州僻遠去處尚有些少敗殘徒黨已遣兵前去招捕外今來盜賊

委是衰息所有逐官備見宣力委有功效欲望聖慈詳酌特降睿旨施行

乞施行修城官吏奏狀

勘會先奉聖旨指揮令逐路帥司督責所屬州軍專委守貳各行點檢城壁若城大難以因舊修築仰隨宜減處務要省便臣尋契勘洪州城池自建炎三年十月內經金人殘破之後不曾修治城壁摧毀壕塹堙塞并無樓櫓器具兼城北一帶皆無居民盡是荒閒田土地步

闊遠又城外積沙高與城齊可以下瞰城中緩急難以
防守恭依前項聖旨指揮相度到合行裁減自洪喬門
至崇和門取直修築新城門塹壕塹卻將舊城裁減充
防捍江水堤岸臣一面允那本司錢物計置材植磚灰
等物料於諸州刷壯城兵士量行差撥及本州壯城廂
軍并於洪州管下縣分應干僧寺道觀有常住物業者
紐計稅錢量差夫力各日支破口食錢米相兼工役已
節次具因依奏聞去後續准朝廷支降空名承信告一

十道助教勅二十二道應副變轉支用自紹興七年正月
初五起工創新截築城身長七百一十二丈五尺根
基闊二丈五尺面收闊一丈八尺并護膝牆女頭通高
二丈二尺表裏並用磚裏砌及墁砌城面砲臺墁道甃
城亦係用磚裏砌計用過新磚一百餘萬並係置窯燒
變並令窯戶斷撲供應及於城外開掘週迴壕河計長
七百一十二丈五尺面闊六丈深一丈六尺并造到馬
面敵樓大小共一百餘座計六百六十餘間及計備城

上要用防城器具筴籬牌狗脚木砲坐檣木等修蓋諸城門樓一十一座甕城兩所釣橋四座防城器具庫屋兩處計四十間並皆齊備據都壕寨官申十一月十五日修城畢工已將寺觀人夫等犒設放散其有所用錢糧收買磚灰木植等物盡係本司措置應副並無一事一件取於民間所有首尾宣力官吏欲望朝廷詳酌施行謹具如後須至奏聞者

提舉官

武功大夫特差權發遣江南西路兵馬鈐轄洪

州駐劄武登

左朝奉大夫通判洪州軍州事崔耀卿

左朝奉郎權通判洪州軍州事李剝用

都壕寨官武節郎杜觀

製造樓櫓防城器具及受給錢糧官

武功大夫忠州防禦使前洪州兵馬都監時光

祖

武功郎江南西路安撫制置大使司准備將領

張復

受給埽木器具官

下班祗應蕭安 張道

部役官

從義郎白惇智

忠翊郎孫臯

成忠郎周端

保義郎蘭浩

進義校尉張福

下班祗應張唬

進武副尉郝敏

本司點檢文字

進武副尉楊安中

保義郎雷德成

主行人吏四名

張京

何琳

陳光祖

湯頌

右謹件狀如前謹錄奏聞

謝提舉臨安府洞霄宮表

臣某言伏奉勅命除臣提舉臨安府洞霄宮已望闕謝恩祇受訖者分閭踰年莫著蕃宣之效奉祠得請曲蒙覆護之恩感涕無從兢慙罔措中謝伏念臣誤膺器使素乏材能徒有憂國愛君之心曾無周身防患之術囊封上達每罄愚忠函詔俯頒屢叨睿獎夫何抵忤自取

悔尤嘖有煩言愧瀆蓋高之德事無實狀難當溢惡之
辭豈敢辨明但祈照察茲蓋伏遇皇帝陛下以慈為寶
體道宅心推善脩之深仁擴納汙之宏度致茲盛德施
及孤蹤臣敢不省循致謗之由克謹保身之戒攀援望
絕方屏跡於山林祝頌誠深願憑因於香火

梁溪集卷一百一

欽定四庫全書

梁谿集卷一百二

宋 李綱 撰

表劄奏議六十四

論使事劄子

辭免知潭州奏狀

辭免知潭州兼荆湖南路安撫大使奏狀

辭免第三奏狀

允詔

謝免荆湖南路安撫大使兼知潭州依舊宮祠

表

論使事劄子

臣竊見朝廷遣王倫使金國奉迎梓宮往返屢矣今者
倫之歸與金使偕乃以江南詔諭為使名四方傳聞無
不駭愕何者兩國通使講好息兵以禮為先自敵以上
無所不用其至禮之經也乃今不著國號而曰江南不
云通問而曰詔諭此何禮也宋有天下幾二百年祖功
宗德以聖繼聖聲教溢於四表炎運中微夷狄亂常馬
致靖康之變國祚幾絕賴陛下總師大河之北入繼大

統羣臣推戴克受天命履大寶臨萬邦為神民萬物之主一紀於茲矣敵人遣使乃敢命名如此自古夷狄陵侮中國未有若斯之甚者原其所自皆吾謀慮弗臧不能自治自強偷安朝夕無久遠之計羣臣誤陛下之所致也臣請試為陛下詳言之方靖康末金人破都城毀宗社逼二聖鑾輿以北遷易姓建號而陛下應天順人光復舊業自我視彼則仇讎也自彼視我則腹心之疾也豈復有可和之理然而朝廷遣使通問冠蓋相望於

道路卑辭厚幣無所愛惜者正以二聖在其域中為親屈已不得已而然猶有說也至去年春兩宮凶問既至陛下抱哀銜恤創鉅痛深雖未能躬率六師以報不共戴天之讐猶當寢罷使者絕不與通以正仇讐之名慎固封守選練將帥以為自保之計觀釁待時動必有功傳曰名其為賊敵乃可服欲正仇讐之名以張恢復之本正在此時而朝廷失策復遣使以迎梓宮亟往遙返帑藏為虛初不得其要約今者敵使荐至廼建詔諭之號

公肆陵侮不知朝廷將何以應之夫奉迎梓宮乃陛下
孝思罔極在人情不得不如此者然金人狡獪動出計
謀我以誠求彼以詐應借此為重成其姦心不知朝廷
何所憑信臣恐墮其計中禍難之未艾也臣聞忠信為
周古者遣使以忠信為主故小雅於皇皇者華君遣使
臣之詩諏謀度詢必以周爰為言使不忠信為國之患
非淺淺也彼王倫何為者市井鬬僧之才左右賣國之
伍三尺之童皆知其不足信而朝廷信之此必有甘言

以中朝廷之欲臣恐聽虛詞而受實患如楚之信張儀以求商於之地也且倫使事初以奉迎梓宮為指而金使之來乃以江南詔諭為名循名責實已自乖戾則其所以罔朝廷而生後患者不待詰而可知臣在遠方雖不足以知其曲折然以愚意料之彼為此名以遣使其邀求大略有五必降詔書欲陛下屈體降禮以聽受一也必有赦文欲朝廷宣布頒示郡縣二也必立約束欲陛下奉藩稱臣稟其號令三也必求歲賂廣其數目使

我坐困四也必求割地以江為界淮南荆襄四川盡欲得之五也此五者朝廷從其一則大事去矣天子之令曰詔臣下則以稟令受詔為事倘屈體降禮權時之宜以聽其詔令則君臣之分定矣君臣尊卑如天地相遠降尊就卑以天為地可乎其不可者一也天子之恩曰赦臣民則以遇赦該恩為幸倘朝廷宣布頒示郡縣則天下知朝廷之勢去士民之心離矣其不可者二也履至尊以制六合曰天子謹制度以為諸侯曰藩臣天子

出命者也藩臣稟令者也倘奉藩稱臣稟其號令則事不在我國家之勢傾矣其不可者三也朝廷全盛之時歲賂金人百五十萬猶不能給遂至敗盟今日依據東南財用鮮少又有養兵之費日益窘迫而欲增賂以求全蓋亦難矣其不可者四也淮南荆襄江浙之屏蔽也四川天下之上流也不能措畫屏蔽保有上流資天險結人心以為固而欲割要害之地棄民以求安必無之理其不可者五也金人變詐不測貪婪無厭縱使聽其

詔令奉藩稱臣其志猶未已也必繼其號名或使親迎梓宮或使單車入覲或使移易將相或使改革政事或竭取賦稅或朘削土宇從之則無有藝極一不從則前功盡廢反為兵端以謂權時之宜聽其邀求可以無後悔者非愚則誣也使國家之勢卑弱果不足以自振不得已而為此固亦無可奈何今土宇之廣猶半天下臣民之心戴宋不忘與有識者謀之尚足以有為豈可忘祖宗之大業生靈之屬望弗慮弗圖遽自屈服祈哀乞

憐冀延旦暮之命哉昔少康以一旅之衆祀夏配天不
失舊物光武騎牛從軍殺新野尉然後得馬率烏合三
千破尋邑百萬遂定中興之業晉保江左財用匱乏王
導至身衣練布誘善賈以濟國用卒延國祚百有餘年
今朝廷事力雖不足以望全盛之時然將士如雲帶甲
之卒數十萬士馬之盛豈不過於少康光武穀粟金帛
運漕不絕舳舻相銜財用之多豈不過於東晉有可爲
之資而陛下又有過人之聰明何憚不爲而欲北面以

事仇讎甘受此屈辱也夫自古創業中興之主多由布衣奮空拳以取天下非吾之兵民財用而吾能因而用之積累以成帝王之業詒謀子孫垂裕無窮今兵民財用皆祖宗之所以遺我者而陛下不思所以用之遽欲委身束手受制於仇讎之手此臣之所不曉也陛下縱自輕奈宗社何奈天下臣民何奈後世史冊何且立大事建大功者必以作士氣得人心為先而號令賞罰者其具也人心士氣在今日雖已不及建炎之初然審號

令明賞罰以振起之尚為我用陛下一受制於強敵號
令賞罰皆不由於已出士氣日索人心日離將士益桀
驁而不可馭民庶益泮渙而不可蓄威令一去如神龍
之失水為螻蟻所困後雖悔之噬臍何及此臣所以夙
夜痛憤而寒心也議者必謂勢有強弱弱者必服於強
故太王事狄勾踐事吳孫權事魏皆行權以濟大業藉
此以感動聖意臣皆以為不然昔者大王居邠狄人侵
之事之以珠玉犬馬皆不得免徙居岐山之下從之者

如歸市狄人乃已今陛下能以此已金人之侵乎勾踐
身入吳以為臣僕僅得歸國枕戈嘗膽卒以報吳今陛
下能以此報金人之仇乎孫氏起於江東未能自立故
臣魏以俟時今陛下藉祖宗二百年之基業縱使未能
恢復土宇豈可不自愛重而怖懼屈服以貽天下後世
之譏議哉為此說者但欲求合於朝廷之意而不顧患
禍之在後臣愚竊以為過矣昔趙欲帝秦魯仲連辭而
折之以謂秦帝則諸侯皆為所制不聽命則誅戮隨之

欲帝秦者知其利而不知其害秦非禮義之國仲連有蹈東海而死耳不忍為之民也新垣衍屈不果帝秦而秦師為之退舍曹操以十萬衆臨荊州勢搖東南雖張昭亦欲迎之周瑜為孫權畫策以謂如臣者何往不可將軍安所容乎權拊案大悟遂有赤壁之戰而鼎足之勢成此二人者其所陳說深切著明二君聽之遂能反禍以為福轉敗而成功胷中照了明白洞達果斷而不疑也今彼使之來其用事者未必不以兵隨之以為脅

制之術顧朝廷所以措置者如何耳措置有備雖苻堅
百萬之師不足畏措置無術雖數千百騎便足以為吾
擾方危迫之秋無排難解紛之略則無貴於智者矣朝
廷自十數年來議論不一執守不堅無規模素定之計
玩歲愒日苟且過時無積累就緒之功唱為和議者紛
紛趣度目前而不以後艱為念以致今日之陵侮非偶
然也忠義之士懷才抱智不能自達者顧豈乏人臣願
陛下特留聖意且勿輕許深詔羣臣講明利害可以長

久之策悉以上聞陛下擇其善者而從之廣謀兼慮而不偏聽於今日事必有所補臣昨於建炎元年嘗獻國是之說以謂朝廷不能自强自治但欲卑屈以從之雖至於奉藩稱臣敵人之謀勢猶未已又於紹興五年蒙降詔訪問嘗獻乞罷議和之說以謂遣使議和敵人必制我以必不敢為之謀邀我以必不可從之事非徒無益而有害於吾自治自强之計為患甚深區區之忠幸蒙睿察今日之事無他遣使議和不已使敵人得窺伺

謀畫皆引惹之所致也臣願陛下為宗社大計萬機之餘長慮卻顧覽前古之興亡究今日之利害儻或權時之宜稟其號令自後別有湏索如前所陳復稟正朔易服色趣朝會擅誅賞盡取鞍馬器甲之類當如何處之而吾之士氣既索如何可以復振人心既離如何可以復收國勢既傾如何可以復定今日執和議生事者果能任其責而保其必不然乎遠察太王勾踐之事與今日不同深味仲連周瑜之言與今日相若利害昭然矣

臣世受國恩奉事三朝蒙陛下知遇尤厚常願奮不顧身以徇國家之急今事勢危迫所以應之一失機會則禍難相尋為害有不可勝言者又非前日之比區區孤忠願效愚計第恐朝廷不能用之夫用不用在朝廷而臣激於義有不得不言者惟陛下留神幸察臣竊觀國家之與金人勢不兩立而今日之事止在於絕之與通亦不難決也與之通則聽其號令而臣屬之動為所制身危國蹙必至於亡而後已與之絕則圖所以自治自

強者選將勵兵待其來而禦之勝負之勢猶未定也與其事不共戴天之讎仰愧宗廟俯失士民之心而終歸於亡貽羞無窮曷若幡然改圖正仇讎之名辭順理直以作士民之氣猶可以履危而求安轉亡而為存未為失策也二者利害相去遠矣臣願陛下出自睿斷正王倫誤國之罪而肆諸市朝彼使未入境則卻而弗納已入境則拘留而勿遣降哀痛罪已之詔深咎前日和議之失丁寧反覆其言切至以激勵天下臣民將士之心

盡取賂遺敵人金帛以募敢死之士訓練習服以守邊疆以備不虞以制敵人衝突此計既定詔旨既頒臣將見人情翕然回心易慮天地神明亦當助順強敵之師不戰而自屈矣然後據江淮以為固進賢俊退佞諛修政事明賞刑治軍旅積金穀待時而奮以圖恢復此豈可與受制於人甘心屈辱同日而語哉且劉豫者金人之所立八九年間豫之所以奉金人者可謂至矣一旦廢棄如弁髦土梗何則彼為利謀而初不以恩信為事

也陛下視金人之於我孰與於豫豫猶如此於我可知
彼雖以江南數千里地王我為言猶不足信而況於復
故境歸侵疆乎唯智者可與料敵唯明者可與照姦陛
下或以臣言為未然願降臣章與羣臣之有智略者慮
而圖之勿為單見之所惑勿為讎敵之所欺勿至將來
追悔不及而後悔則宗社生靈之福也傳曰日中必昃
操刀必割時乎時不再來臣言可採陛下斷而行之勿
疑以為議論乖謬而害於今日之至計願先斧鉞之戮

以懲妄發夫主憂臣辱主辱臣死國家事勢至此死何足惜惟陛下裁幸臣昨任江西安撫制置大使日因淮西鄺瓊之變以已見利害具奏申聞誤蒙聖恩降詔獎諭以疏中論及侍從臺諫以謂侍從者論思獻納之官臺諫者耳目腹心之寄以言為職類皆毛舉細故以塞責所論不過簿書資格守卒令丞除授之失當至於國家大計係宗社之安危生靈之休戚初未聞有一言及之遂犯臺諫之怒厚誣醜詆以無為有羣起而攻之伏

蒙聖慈洞照非辜力賜保全使得歸休山林養病藏拙
臣之為幸大矣蒙垢忍恥不敢自明絨口結舌不敢復
與世事故芻蕘之言久不上達然惓惓之心未嘗一日
不在赤墀之下也今聞使事方亟所係國體非輕存亡
之端非獨安危而已臣不勝憤懣敢以狂瞽干冒天聰
罪當萬死俯伏俟命

辭免知潭州奏狀

右臣今月二十日准尚書省劄子二月八日三省同奉

聖旨差臣知潭州臣聞命震驚罔知所措伏念臣受材
謏薄賦分竒窮誤被使令存更方面無絲髮之功以報
殊遇有丘山之咎以致煩言閑廢以來歲月未久遽蒙
杖拭復界藩維自顧何人可以當此矧湖湘之重地乃
東南之上流兵火之餘寇盜未靖師帥之選授受惟難
如臣憂患餘生疾疢交作血氣凋零精力弗強自藏寂
寞之濱尚嗟衰瘁儻膺繁劇之寄必致顛隳伏望聖慈
垂情舊物憐駕馬之已老哀倦嗣之屢傷特降俞音收

回成命使遂安于丘壑庶或保於桑榆仰報大恩願期他日

辭免知潭州兼荆湖南路安撫大使奏狀

右臣近准尚書省劄子二月初八日三省同奉聖旨差臣知潭州已具奏辭免未奉回降指揮續准尚書省劄子二月十一日三省同奉聖旨除臣兼荆湖南路安撫大使又准尚書省劄子二月十五日奉聖旨令臣不候受告般家接人疾速前去之任仰荷聖恩不勝震懼竊

念臣自朝廷多事以來每被使令不敢辭難而臣稟性迂愚動輒妄發易犯衆怒自致煩言昨者蒙恩起廢兩帥江湖但知激勵以向前不虞彈射之在後皆遭白簡公肆詆誣以是為非以無為有凡鄉黨自好之士所不為者猥瑣污蔑無所不至雖蒙朝廷洞照曲賜保全置而不問然露章既傳孰不駭愕臣深惟大臣之義獲謗于時但當靜默循省以冀朝廷之見察不敢自明孤遠寡與又無為臣言者包羞忍恥分老山林藏拙待盡絕

意榮望豈謂天恩軫念舊物亟加甄錄不終棄捐收於
寂寞之濱付以兵民之重雖韓安國起徒中而為內史
張敞由亡命而綰郡章較臣所蒙何足為喻然長沙乃
臣舊治當時不以善去今日何可在行即使臣頑鈍無
恥貪戀恩渥延見吏民何以為顏況臣齒髮浸暮衰病
相仍積憂熏心精力頓耗儻不自量復當重寄必致踈
虞以誤國事所繫匪輕伏望聖慈察臣惓惓之誠非敢
飾說託故為辭特降其睿旨追寢成命許臣依舊外任

宮觀庶幾晚節不至顛隳天地父母之恩終期報稱

辭免第三奏狀

右臣伏蒙聖慈以臣具奏辭免新除知潭州兼荆湖南
路安撫大使特降詔書不允者仰戴天恩第深感涕臣
聞人君知人善任使則足以成功人臣奉公匪懈則足
以稱職各盡其道非相為賜也臣以散材遭逢休運蒙
陛下起於罪戾閒廢之中付以方面兵民之寄者屢矣
德厚恩深每欲黽勉自竭以圖報萬一而以迂疎之故

無周身之術動致煩言溷瀆宸聽卒不能有以少稱知
遇之意此臣所以夙夜感歎而不遑啓處也今者罷自
江西為日未久又蒙湔洗畀以帥權雖陛下日月之光
幽隱必燭而微臣螻蟻之跡跼蹐靡容昔漢文帝聞季
布賢召之既而罷歸布曰陛下以一人譽召臣一人毀
去臣恐天下有識者有以窺陛下也顧臣區區之進退
如雙鳬乘鴈之去來何足少多然數年之間亟奮亟躡
上累陛下知人任使之明實有係於國體况臣衰病日

加精力凋耗積以憂患心氣不寧豈可復當上流重鎮
之任伏望聖慈察臣精誠非敢飾說以辭難檢會臣累
奏追寢成命依舊外祠以安愚分臣不勝祈天望聖激
切屏營之至

允詔

勅李某省所奏乞檢會累奏依舊外祠事具悉朕念遠
民且以湖湘帥閫之重簡求宿望徃鎮臨之卿許國之
忠不擇地而安有自來矣茲覽來疏至於再三是何辭

之力也重違卿意其復以真祠之祿從所便安抑不失
朕體貌之意可依所請依舊提舉臨安府洞霄宮任便
居住故茲詔示想宜知悉夏熱卿比平安好遣書指不
多及

謝免荆湖南路安撫大使兼知潭州依舊宮祠表
籲天請命方虞雷電之誅稱物施仁遽霑雨露之澤荷
恩益腆撫已增慚中謝伏念臣少也過庭嘗聞詩禮之
訓晚而遇主濫陪宰輔之司雖迂踈素乏經世之遠猷

而拙性常謹律身之小節坐罹讒毀皆出怨仇馬援讒
深誰與辨明於憲實義之誓墓但期終老於蘭亭豈謂
大君未忘一介起於閑地付以名藩而臣景迫桑榆衰
先蒲柳憂畏甚矣直類傷弓之禽疲瘵蕭然久抱負薪
之疾既不獲黽勉以承命又深懼稽遲之速辜夙夜靡
遑進退維谷念父母之於厥子惟疾痛之為憂而天地
之於羣生俾飛潛之各遂力布由中之懇求蒙從欲之
私琳館優游尚叨厚廩海邦深遠仍許便居此蓋伏遇

皇帝陛下體道宅心用人維已不遺簪履之舊物每賜
記憐尤矜樗櫟之散材曲加庇覆致滋孤陋亦獲保全
臣敢不克戒暮塗益修素履甘山林之寂寞一洗五十
七年之非馮香火之因緣上祝億千萬歲之壽

梁溪集卷一百二

欽定四庫全書

梁谿集卷一百三

宋李綱撰

劄子一

與宰相論捍賊劄子
與右相條具事宜劄子

與宰相乞兵劄子

與宰相乞王彥軍馬劄子

與宰相論捍賊劄子

某伏覩進奏院報三省樞密院同奉聖旨探報敵人窺

伺承楚如別有警急當親總六師以臨大江某於十月二十二日已曾具奏以今日捍禦賊馬事勢陳獻三策自福州入急遞投進今來又覩進奏院報韓世忠統全軍於承楚間迎擊賊兵連獲勝捷有旨分遣臺臣督劉光世張俊統兵渡江應援車駕已起發進臨江上撫勞諸軍竊惟朝廷當危急艱難之秋為宗社生靈之計建大議決大策不貳不疑毅然親征將士用命捷音系路廟謨克壯敵勢退屈誠可為天下大慶然賊情狡獪戎

事方棘機會之來間不容髮某輒敢竭其愚慮陳十事
以獻伏望鈞慈特賜詳覽有可以裨廟算之萬一者願
施行之勿以人廢言不勝幸甚謹具下項

一宜防備生兵某竊覩偽齊劉豫招誘叛將驅河北
河東陝西之民挾帶寇騎侵擾淮甸聚糧既久

傳聞
偽齊

聚糧於淮陽宿遷縣甚久
為入寇之計非一朝一夕

入寇亦早

往年寇騎南牧
多以春冬之交

今偽齊以冬初已入
寇比之往年為早

倏然有窺伺江左之意今既王

師屢捷挫其銳氣勢必遲留境上乞師金人萬有一

重兵繼來我以疲乏之兵當新羈之馬則將何以取
勝宜命諸將蓄養銳卒更進迭休使有餘力以待之
又於諸路摘那精銳軍馬以為濟師之計庶幾可以
捍禦

一宜防備海道某竊聞偽齊劉豫於登萊等州多造
海舟又於楚海等處虜掠客旅舟船其用意非淺淺
也方冬月風便之時勢須驅使山東之人自海道犯
浙東一帶濱海州縣則吾腹內之民擾矣然自海道

來者必皆步人實不足畏朝廷既遣兵將分屯明越
以備不虞而沿海州縣巡尉弓兵數不為少合之則
勢强分之則勢弱宜命帥司并提刑司團結成軍於
要害地擺布控扼又募海上土豪自備舟船巡越捍
禦許以將來事定重與推賞不為無補

一宜防備上流某竊觀自昔侵犯東南未有不由上
流者舳艫相接順流乘風自川江而下日數百里不
旬月間可至江浙故上流之地自吳及東晉以來必

屯重兵乃可保國今歸峽荆南岳鄂九江一帶雖無他虞然屯兵不多所幸襄漢復為我有上流形勢倚之為重襟帶荆蜀控引江淮下瞰畿甸真形勝必爭之地也宜命大帥統重兵以鎮襄陽則上流有屏蔽之勢江浙可以奠枕中原有恢復之兆畿甸可以俯窺此最今日之上策惟廟謨熟計之

一宜防備四川某竊觀金人累年侵犯四川其意蓋以蜀中富庶欲必得而後已所幸山川險固將士用

命僅能保守今賊馬南牧擾我淮甸安知不別遣重
兵窺伺川峽道里遼遠號令難通都督旣已不行兩
宣撫不相節制邈然一方深可憂慮宜命信臣早臨
撫之布宣威德不失機會庶幾四川生靈有所依怙
國勢賴之以安非細故也

一宜保據淮南某竊聞金人中間通使屢有畫江之
言蓋為劉豫之計今賊馬南牧雖未必敢窺江左其
意決欲盡得淮南深慮兵交使在其間復有畫江之

請朝廷欲紓目前之急或遂許之則大事去矣夫淮南者江南之屏蔽也六朝所以能保有江左者以強兵巨鎮所以為藩籬者盡在淮南故以魏武之雄符堅石勒之衆宇文拓跋之盛卒不能窺江表後唐李氏有淮南則可以都金陵其後淮南為周世宗所取遂以削弱此必至之理也萬一有畫江之請謹不可許宜命諸將協力擊賊使之退避將來措置淮南當於兩路置兩大帥以臨之東路揚為帥府屯重兵為

根本之地分遣兵將進守楚海濠泗壽春淮陽沿淮
一帶諸郡小築城壘如開新邊其初朝廷應副錢糧
徐議營田使自贍養遇有賊馬則大帥遣兵應援稍
能自守乃可召人歸業漸次葺理假以歲月而藩籬
成矣前有藩籬之固後有大江之險然後可以立國
而議攻討之策近年以來大將握重兵於江南官吏
守空城於江北雖有天險初無戰艦水軍之備不幾
於倒置而虛設乎願廟堂熟計之

一宜調和諸將某竊聞師克在和不在衆將帥不和而能成功者未之有也武人之性剛果有眦睚之失必相怨憤而激以忠義則徃徃復合者其性然也郭子儀李光弼同在朔方未嘗同堂共席而坐一聞安史之變子儀中分麾下與光弼勉之立功何則先國家之急而不以私害公也賁復寇恂不相能光武解之曰天下未定兩虎安得私鬪朕為分之於是並坐極歡共車同出結友而去今朝廷所賴以為爪牙者

三大將也平居無事之時人情豈無纖芥今當朝廷
艱危之秋使之各渡江以相應援則當以調和之為
先宜贊淵衷降宸翰遣近臣推明古之將帥徇國家
之急而忘私忿之意勉以忠義使之歡然犄角立功
則賊雖衆多不難破也願廟堂留意

一宜增置禁衛某竊觀自古人主必有親兵所以制
障表裏為長慮卻顧之術也祖宗禁衛之兵總之三
衙其制甚備自經變故以來人數浸少止以將兵為

衛非强本弱枝之策今將兵既遣渡江宿衛單寡何以鎮服中外倉卒召募固難得人謂當有術以權之竊見近降指揮復置御營使司宜因此時號召諸路統制官之有名望者使率其部曲充御營使司五軍統制平時與禁衛之兵相參宿衛緩急聽御營使司使喚更不隸屬諸大將下使軍容奮張國勢益隆誠今日之先務也

一宜廣備糧食某竊謂用兵以糧食為急糧食以飛

輓為難今賊兵擾吾淮甸將士捍禦勢或持久則糧食不可不廣為之備訪聞湖南米斛百錢江南東西歲亦豐稔朝廷近者增置漕臣宜命江湖廣行收糴措置舟船順流而下儲蓄於建康鎮江轉漕淮甸以給諸軍庶幾倉卒無乏絕之患若止仰常賦深恐緩急不免科須米價翔踴民力重困惟廟堂圖之

一宜措置戰艦水軍某竊觀大江限制南北實為天險然必以人力加之險乃可恃魏武親臨瓜步孫權

以舟師拒之見旌旗戈甲之盛歎曰生子當如孫仲謀權告以春水方生疾癘將作操乃還其後曹丕南伐見波浪洶湧吳師有備亦曰彼有人焉未可圖也遂班師由是觀之據長江之險擇要害之地置戰艦水軍使形勢相接金鼓之聲相聞敵人雖有百萬之師豈敢輕犯哉何則彼為濟渡之謀而我有攻擊之具主客之勢既不相侔北人所習又非其利真東南形勝保國之要術也今國家權寓江左而累年以來

不聞措置設險之策使敵人得以窺伺玩歲愒日於
閒暇無事之時遑遽震恐於倉卒擾攘之際有險而
不議所以守之者可以為而不為真可惜也荆湖間
車船乃唐嗣曹王臯遺制其大有至三四十車者挾
以雙輪鼓棹而進駛於陣馬又仁宗朝修武經摠要
該載古今戰艦之制甚備願命荆湖及頒降式樣於
沿江諸州使之製造召募水軍統以將佐逐時閱習
可以為長久之利非一時之急而已天下無不可為

之事勿謂緩不及事而遂置之天下幸甚

一宜措置楊么某昨任荆廣宣撫使日招捕羣盜數萬人惟湖北賊楊么據重湖之險非有戰艦水軍未可攻討嘗具楊么本末申奏以謂此賊不可輕是時朝廷已罷荆廣宣撫司特降指揮令某節制湖北荆南同共進討方措置間某蒙恩罷任朝廷委制置使王瓊同兩路帥臣措置迨今未聞殄平勢頗猖獗蓋此賊非陸地羣盜之比據重湖環千餘里出沒不常

其徒皆舟人漁子便於操舟又有潰散兵卒竄其間以教之戰我師深入欲速成功則往往不利屯聚持久則錢糧之費不貲今又淮甸警急朝廷不免摘那兵將則此賊之勢又復鸛張未有掃蕩之期為吾牽制非細故也宜命兩路帥臣謹重未須深入俟其抄掠則隨宜擊之分兵屯瀕湖諸邑使之不得侵漁種植以絕其糧明出文榜揭近上首領姓名重賞捕之許其徒中自相殺併以攜其黨與之心賊必漸困然

後可圖兵以緩為速如趙充國之討先零是也今其徒既衆必示以生路乃可使之解散而取酋首必欲盡滅以堅其從賊之志非策之得也惟廟堂裁處

與右相條具事宜劄子

某竊以主上躬睿智神武之姿有知人之明所以待遇相公仰成恢復之業者信任之專古所未有相公蘊王佐之才有不世出之略被受眷知願捐軀以徇國者精忠之誠遠追古人憤強敵之憑陵恥逆臣之僭竊悼二

聖鑒與之未還憫中原生靈之塗炭深謀遠慮圖此武功此固十數年來天下士民之所僣望者也然而適當旱暵之餘財用匱乏民力凋瘵不取於民則調度不足取之過甚則人心驚疑正在斟酌損益之間使軍不乏興民不告病乃為得策輒殫淺短之慮庶幾萬一之得以禪廟筭伏望鈞慈特賜采擇謹具下項

一某昨過衢州竊見都督行府劄子頒降官告勸誘上戶進納文臣司宣敎郎至廸功郎武臣自修武郎

至承信郎價直各有等差計錢六十一萬貫內宣教郎六萬貫迪功郎一萬貫其餘升降各以萬五十貫為率契勘自來進納文臣止於判司簿尉遇有功改官即轉入右列蓋所以清流品重名器也今以京朝官許之進納恐失本意又上戶之家雖有物力安能目前具六萬緡以買一官若分科衆戶則未知此官當使誰受某謂不若以一宣教郎分為六迪功郎倣此以行則上戶易出財人情樂於入仕州縣勸誘不

至費力又無輕名器之患就不得已之中此為長策
仍於諸郡量減分數庶幾不至竭澤易於趨辦伏望
鈞慈更賜裁處

一某契勘本路人戶合納今年夏稅和買物帛朝廷
元降指揮立定分數從第四等已下折納價銀依自
來條限起催蓋優饒下戶易於催納今承都轉運司
公文准尚書省劄子勘會本路合發折帛錢元責限
三月樁足欲督責兩漕臣拘催日下並要起發盡絕

奉聖旨依仍展十日若依所展日限合至四月十日
了足今來正是蠶麥未熟新陳不交之時本路洪吉
筠袁江撫州興國臨江軍皆係災傷至重其第四等
已下人戶多是官中見行抄劄賑濟之人難以預行
催納如州縣逐急於上戶催科將來下戶卻合入納
本色顯是重困除已申奏朝廷乞將本路災傷州縣
合起折帛錢依條限催納其餘州縣自依今來立限
指揮庶幾災傷下戶得被實惠不致逃亡更望鈞慈

特賜照察

一某竊見諸路應副岳飛錢米並津船至郢州文卸
勢須先有重兵屯駐及修蓋倉庫安頓去處又自漢
沔至郢州千有餘里密邇偽境須得軍馬防護糧道
乃可無虞某竊以謂不若且於郢州樁管候將來大
軍進發沿漢江有備乃可旋次措置津船實為得策
更望鈞慈特賜裁處

一某竊見自軍興以來收於民者非一降官告給度

牒賣戶帖理積欠折帛博糴預借和買名色甚多當
此旱災之餘民力已困誠願朝廷講求理財之道救
弊覈實開闢貿遷使不斂於民而用度足乃為長久
之計伏望鈞慈特賜垂念

一某近因入劄子論兵家利害妄意朝廷措置有未
盡善者五宜預脩者三當善後者二議論迂踈誠不
足裨補廟謨之萬一姑盡其拳拳之忠而已輒錄副
本拜呈伏望鈞慈特賜詳覽

與宰相乞兵劄子

某已具狀申都督行府本路虔吉袁州建昌軍等處近來盜賊頭項漸多蓋緣軍馬單弱不足鎮壓如處州元有李山一項軍馬賊勢稍息李山近為岳飛勾回賊盜遂復猖獗接連袁吉一帶饑民嘯聚作過本司雖遣發軍馬人數不多深慮賊勢滋蔓為數州之患將來難以殄滅伏望鈞慈早賜指揮於近便處先撥軍馬二三千人赴本司相兼使喚錢糧之類令轉運司於上供錢內

應副庶幾盜賊可以措置及前期訓練以備將來防秋之用不勝幸甚

與宰相乞王彥軍馬劄子


某契勘近嘗條陳本路防秋利害乞差元所請本路軍馬一萬人及於劉光世岳飛軍中摘那軍馬於舒蘄黃州駐劄已具奏聞去訖近聞劉光世軍馬已起發往廬州岳飛軍馬已起發往襄陽府本路所乞軍馬未蒙都督行府差到沿江一帶並無控扼切慮賊情狡獪或有

窺伺乘間擣虛無兵應援深為可慮兼契勘岳飛大軍
移屯襄陽所有錢糧並係本路應副經由蘄黃等州自
沔鄂以趣襄漢實以本路為根本以蘄黃等州為咽喉
之地萬一本路為賊所擾蘄黃等州為賊占據無兵捍
禦即根本之地騷動錢糧無自而取咽喉之地阻塞糧
道無自而通襄漢之軍坐見困乏為害不細若待臨時
申請決致誤事前後累申所乞軍馬非獨止為本路之
故近准都督行府劄子已勾王彥軍馬赴行府約七八

月間可到候到日差撥前去勘會王彥軍馬見在荆南府未曾起發將來到得都督行府須在八九月間卻行差撥前來已是深冬不惟往返虛費日月兼又軍馬勞頓後期失事伏望朝廷特賜指揮令王彥軍馬候將來過本路日就便存畱聽本司節制於沿江分布防扼及抽那往虔吉等州討捕盜賊庶幾不致闕誤所有乞於劉光世岳飛軍中差兵前來舒蘄黃州駐劄亦乞早降指揮施行

小貼子

契勘本司近准都督行府劄子已巡按淮甸所有合
申請事件申取朝廷指揮今來所乞就便存留王彥
軍馬伏望鈞慈詳察早降指揮



梁谿集卷一百三